



Netulen jaorvergeerding SSR 25 meie 2024 in de Mejander in Berkoop

Anwezig: 33 meensken(lieste bi'j bestuur)

Gast: deputeerde vrouw Eke Folkerts

1. Eupening deur de veurzitter:

De veurzitter, Klaas van Weeperen, eupent zien laeste vergeerding as veurzitter. Hi'j hiet de deputeerde, vrouw Folkerts, welkom. Naor anleiding van de taelnota Fries en de veurneumen bezunigings op de strukturele subsidie van de SSR is d'r tillefonisch kontakt west. De veurzitter het heur uutneudigt. Mooi dat ze tied veur oons het.

De veurzitter neumt et roerige jaor dat achter oons ligt. Zo veraanderden de bouwplannen in een verhuusplan, bi'jveurbeeld.

Et bestuurlik overleg mit de drie overheden kwam weer niet van de grond. Dit tot argernis van et bestuur. De kontakten bin tillefonisch prima en ok mit de ambtenaoren is de kommenikaosie op odder, mar we kriegen et niet veur mekaere om iederiene om dezelve taofel te kriegen. Slim jammer.

2. Anslutend leest vrouw Bos **de netulen van de veurige jaorvergeerding** veur. Disse bin schreven in et Nederlaans. Berkenbosch vient dit niet kunnen. De veurzitter belooft om de netulen in et Stellingwarfs op de webstee te publiceren.

NB. Dit is intied gebeurd, mit daank an Karst veur de hulpe.

Korrektie op et verslag: et Dorpsarchief huurt bi'j de SSR. De SSR beheert gien archief veur et Dorpsarchief.

N.a.v. de netulen meldt Joke de Boer van O3 dat d'r uutzendings/podcasts maekt wodden deur Elizabeth Bergsma mit de titel "Huus en hiem."

De toevoeging van vrouw Duin an et passeniël het veur de direktEUR ruimte geëven. Dat is dus zoas we verwaacht hadden.

3. Jaorverslag deur de direktEUR Abel Darwinkel

De direktEUR het een prissentaoisie in PowerPoint maekt om de heugtepunten van et oflopen jaor in beeld te brengen. Hi'j neumt de ni'j uutbrochte boeken en vertelt ok over de lessen op et Stellingwarf College. Dit jaor is ok weer de Bergveldpries uuttrekt en wel an Harmen Houtman.

4. Financieel jaorverslag

Oflopen jaor was d'r gien ponghoolder in et bestuur. Vrouw Duin prissenteeft daoromme de veurlopige jaorciefers. De boekhoolder het de stokken niet op tied anleverd, dus et bestuur het de ciefers nog niet goedkeuren kund. Dit zal in juni gebeuren en dan wodt et definitieve jaorverslag op de webstee publiceerd.

De anvroeg veur et energiefoons van Ooststellingwarf moet nog indiend wodden. Deur et veraanderen van energiekontrakt(van flexibel naor vaast) is de jaorrekening niet synchroon mit et kalenderjaor. Hopelik lokt et nog om toch een bi'jdraege te kriegen vanuut Oost.

De verni'jingsimpuls is deur Weststellingwarf nog niet betaeld. Ok dat gef een vertekend beeld.

Vanuut et spaerde bedrag van veurig jaor kan et tekot op de balaans verreken wodden, mar wel jammer as dat zol moeten.

Et gebouw van de SSR wodt verkocht. De opbrengst wodt belegd in een foons. Van de revenuen van dit foons zol de huusvesting betaeld moeten wodden en ok de kosten van de verbouwing van de ni'je huusvesting. Hierin wodt een bi'jdraege an de verduurzaming van et gebouw ok mitneumen, zodat de energiekosten drastisch naor beneden gaon.

5. De anwezigen gaon akkoord mit de **verhoging van de kontribusie** en de automatische inkasso van die kontribusie.

6. Mitdielings bestuur

D'r wodt drok warkt an de anpassings van et oolde/ni'je baankgebouw. In oktober is, naor verwaachting, de eupening. De mitwarking van de eigener, Luitzen de Jong, is geweldig. Dat helpt om tempo te hollen.

De veurzitter gef vervolgens et woord an vrouw Folkerts, om een toelichting te geven op de bezunigings en de taelnota Fries.

Et besluit om te bezunigen op de strukturele middelen van de perveensie is al een tied leden neumen. Et gaot om 7,2 miljoen euro. De uitvoering is in 2026. Daormit zol de helte van de strukturele subsidie van de SSR verdwienen(€ 27500). Dit komt deur et wegvalen van de verni'jingsimpuls. Hierveur komt 1,2, miljoen euro an incidentele middelen in de plak. Dit is meer geld, mar et moet elke keer veur een prejekt anvaard wodden. Hierveur zoj'dan een taelkoördinator bruken kunnen. Vrouw Folkerts markt op dat er nog een ton staot veur et gebruik van et Stellingwarfs in de eupenbaore ruimte. Dit geld vervaalt over een half jaor en is nog niet bruukt. (NB. De SSR is vol in overleg over prejekten veur dit onderwarp)

In et bestuursakkoord is ofpraot dat, wat veur et Fries geldt, ok veur de aandere streeктаelen binnen Friesland geldt. De infrastruktuur is in principe dus ok veur de aandere 15 taelen binnen de perveensie. Ok de 18 miljoen die vanuut et riek uitkeerd wodt is veur alle streeктаelen in de perveensie Friesland.

D'r ontspint heur een felle diskussie tussen de deputeerde en de anwezigen. Et liekt wel of we teroggegaon in de tied. Moen we weer antonen dat we niet Fries praoten is disse streken? Waoromme wodt et covenant Nedersaksisch negeerd? De perveensie het daorbi'j beleufd zich in te willen spannen veur et Stellingwarfs, waar blijkt dat uut? Et is ok een erkende tael en dus niet geliek an de aandere streeктаelen.

Konklusie is dat wat d'r op pepier staot in de taelnota wat aandere is as wat de deputeerde zegt. Ze zol de tekst anpassen moeten. D'r wodt ok waardering uitspreuken veur et feit dat ze kommen is en oons te woord staot.

7. Bestuursverkiezings

Vrouw Bos legt naemens et bestuur uut dat Klaas van Weperen vraogd is om veurzitter te blieden tot de verhuizing en de verkoop van et olde gebouw klaor is. De spoeling in et bestuur is dun, et blijft eerst bi'j 3 leden. Om een aander in te warken en de juridische zaeken te regelen, zol vule tied kosten. Klaas het anbeuden om dit prejekt nog of te ronden. Et bestuur is hier slim bliede mit en gunt Klaas dat hi'j "et lint mag deurknippen bi'j de eupening in oktober". Mocht d'r toch vertraoging kommen in et prejekt, dan beraodt et bestuur zich opni'j. Dit is wel de laeste jaorvergeerdering die Klaas as veurzitter doet. Hi'j is 7 jaor de veurman west en het in die tied een bult wark verzet.

Altied onderwegens en an de tillefoon. Gien perbleem of hi'j ziet wel een oplossing. Altied positief en vol energie. Vrouw Bos bedaankt de veurzitter veur zien inzet en vrouw Duin riekt de bloemen uut.

Olphert Smit wodt bedaankt deur de veurzitter. Zien schaopen kwammen beslist eerst, mar as Olphert anwezig was dan stelde hi'j vaeke kritische vraogen. Dat is waardeerd. Hi'j krigt uteraord ok bloemen.

De veurzitter meldt nog dat Martin Oostra tussentieds oftreden is.

De veurzitter stelt 2 ni'je bestuursleden veur. Gerke Jager uut Oosterwoolde, die as pongholder in et bestuur stapt en Jan Oosterhof van Steggerde, die as oflopen donderdag tot et bestuur toetreden is. Beide mannen kriegen applaus en bloemen bi'j wieze van welkom.

NB. Nao de vergeerding meldede Aukje Opperma heur as siktoaris veur et bestuur

8. Wvodbk

Henk Bloemhoff meldt dat hi'j en een peer aandere meensken een eupenbaore brief schreven hebben an de perveensie en dat disse brief ondertekend woddten kan nao ofloop van de vergeerding.

De veurzitter zegt dat hi'j dat prima vient, mar dat et bestuur een aandere route volgen gaot en veural inzet op et gesprek mit de overheden.

Om 4 ure sluit de veurzitter de vergeerding

Steggerde 1 juni 2024

Ageeth Bos